



Tir YimYim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir YimYim



tir_yimyim



tir yimyim

TAPAK 8

BLA-i Pakistan Army convoy amak, sepai 20 dak tema asü

Elena Rybakina-i US Open tetsür kija asaya kokogo

VOL. XXIII ISSUE NO. 333 (ADOK 333) DIMAPUR TENTONÜ (MONDAY) RONGJUI (SEPTEMBER) 14, 2026

₹ 5.00

Excise & Prohibition dept-i metetdaksür

Dimapur, September 13, 2026 (TYO): Nagaland nung yi tamajung ajemba agi nisungtem asü ta temulung malemba osangtem lir anungji nübortem kanga dang kümdangtsü aser yi majemtsü ayongzüker ta Excise & Prohibition Department-i metetdaksüogo.

Nagaland Liquor Total Prohibition Act, 1989 ajanga Nagaland nung yi abenba, ayokba, ajemba, yangluba, bener aruba aser tangaleni belenba ajunga noktanger aser tang atalokba ya özüngi memelaba yi amshiba den sendaktepa lir ta

Commissioner of Excise Nagaland, Dimapur H. Atokhe Aye, NCS-i sangdong ka nung ashi.

Department-i bangdakpur den amalitepa bushisüngdangka tenzüko aser yi tamajung ta temulung melemi bilemba kong shirnoki yanglu bushiteta özüngi melaba ama inyaksü ta paisa ashi.

Nübertema kanga kümdanga alitsü aser yi tamajung yangluba, bener aruba mesüra ayokba lira anasatiba Excise office nung osang sangoktsütsü mepishir ta paisa metetdaksüogo.

Nagaland Influencers Awards 2026 agütsü



Dimapur, September 13, 2026 (TYO): September 12, 2026 nü "Beyond Influence, Creating Change Together" omen nung ajemdaker tanabuba Nagaland Influencers Summit (NIS) 2026 tembangogo aser iba sentong nung Nagaland Influencers Awards 2026 agüja liasü.

Tetso College, Sovima Campus, Chümoukedima aser Agri Expo, Chümoukedima nung anogo ananü sentong nung creators, artists, entrepreneurs, students, professionals aser public adenshia social media adena orr temelenshi bener aruba indang shisalemsatepogo.

Iba summit nung tongtipang shilem kaji Nagaland Influencers Awards 2026 liasü aser iba ajanga culture, education, arts, music, fashion, food, fitness, entertainment, photography, cinematography o social impact amala wadang balala nung tangari ajiteta mapa tajung inyakba atema tenüngsang agütsü.

Taküm kanga dang tongtipang mapa ka inyakbaji Creators for Community Initiative liasü aser iba nung creators o volunteers külemi longjemer Nagaland kübok district balala nung lokti mapa inyakba liasü.

Nagaland Influencers Awards 2026 angurtem

- 1.Campus Choice Award Winner: Kepozo Kapuh
- 2.Media Integrity Award: Tir YimYim
3. Social Impact Award: Sammy Vlogs
- 4.Emerging Talent Award: Angule Mero
- 5.Cultural Excellence Award: Chongpongmanen Ao
6. Education Excellence Award: Jungio Tee.
7. Arts Excellence Award: tee crochet (Chong.tie)
8. Cinema tography Excellence Award: Kohdi Jing Films
- 9.Photography Excellence Award: Thipuzo Kezo
10. Music Excellence Award: Eva Rongmei
- 11.Fitness Excellence Award: Talitsuba Ao
- 12.Fashion Excellence Award: Tiamongba Ajem
- 13.Entertainment Excellence Award: Rovi Metha
- 14.Beauty Excellence Award: Roko VN Makeup
- 15.Adventure Explorer Award: Thsalongse Sangtam
- 16.Food Storytelling Award: Mukaeats
17. People's Choice Award: Thsalongse Sangtam

NSF-i Dimapur-Kohima highway mapatong atema ola adoker

Dimapur-Kohima highway ya NHAI mesüra State PWD (NH) nem reprangdaksütsüla

Kohima, September 13, 2026 (TYO): Naga Students' Federation (NSF)-i Nagaland nung National Highway mapatongtem inyakba asoshi bushisüngdang ka asütsü takhangba agütsüogo.

Nagaland nung National Highways & Infrastructure Development Corporation Limited (NHIDCL)-i mapa shitak meinyaker, mapang atsülanger aser senzuka yutsür ta NSF-i ashi.

Tesüiba küm pezü-pungu ka tsünga Dimapur-Kohima four-lane highway kanga mejungi kümogo aser iba ya junga anepalu masüba aser tzüngluruwa asoshi teinyaksü tim meinyakba ajanga lir ta NSF-i ashi.

NH-29 nung Medziphema-Peducha stretch nung lendong tulu keta lir kechiyong iba tesem nung lenmang raksaa lir, kilentzü ayimdak shitak mali, nüngkümlen shitak renema mali aser mapang shitak nung meyanglushir ta NSF-isa metetdaksüogo.

Tzüngluruwa aser aonung iba lenmang nung temalen nungi lung aluba aser tanga lendong balala atalako nisung takümtem

samaba den aika yiruogo aser iba ya NHIDCL aser parnok contractor temi senzuka yutsüba ajanga lir ta NSF-isa ashi.

Dimapur-Kohima project nung maparen aika metembang lir aser metokmeperitem liaka Package-II atema Completion Certificate agütsüba ashishir ta NSF-i ashi.

Iba certificate atema Ministry of Road Transport and Highways (MoRTH) ajanga jungjunga bushisüngdang asütsüla ta parnokisa metetdaksüogo.

Iba mapatong ya küm pungu Defect Liability Period (DLP) kübok lir saka NHIDCL-i lenmang raksaba, jara anenzükba, kilentzü ayimdak, slope protection majungba aser tanga metokmeperitem anepalu masür ta NSF-i ashi.

Nagaland nung Kohima Bypass, Kohima-Mao Road, Dimapur Bypass, NH-29 nung slope protection works, Akash Bridge-Jessami Road (NH-202) aser NH-129A Peren-Dimapur section dena tanga NHIDCL mapatongtem nunga kasa tebilemtsütem ajurua lir ta NSF-i ashi.

MoRTH-i Dimapur-Kohima mapatong bushisüngdang asütsü, DLP kübok metokmeperitem reprangshitsü aser senzuka yutsüba mesüra mapa meshitak inyakba atema ketdangsürtem, consultants aser contractors nem tebilemtsü khuret agütsütsü ayongzüker ta parnokisa ashi.

NSF-isa Centre aser Nagaland sorkar dang Dimapur-Kohima highway atema NHIDCL ya implementing agency mesüdaksü National Highways Authority of India (NHAI) mesüra State PWD (National Highways) nem agütsütsü ayongzüko.

Iba highway ya Nagaland aser kidanger state tem atema kanga tongtipang lir anungji public safety aser public interest tematiba südaksütsüla ta NSF-i ashi.

NSF-i Nagaland nung NHIDCL mapatongtem dak maneni tenük yoka reprangtsü aser senzuka yutsüba aser mapa mejungi inyakba manenra Naga nunger taginüba nung ajemdaker özüngi melaba ama maparen inyaka aotsü ta metetdaksüogo.

Nagaland Pradesh Youth Congress-i Tuensang yi lendong aitsür

Kohima, September 13, 2026 (TYO): Nagaland Pradesh Youth Congress (NPYC)-ia Tuensang nung yi tamajung jemer nisung 9 asüba aser aika mozü kidang anepaluba tatalokba aitsüogo.

NPYC-i iba tatalokba atema jungjunga bushisüngdang asütsü, distribution network putettsü, suppliers bushitettsü aser aibelenertem dak özüng tesashi agi merenshitsü takhangba agütsüogo.

September 10 nungi 12 tsünga nisungtemi yi ajemba sülen temang nung timtem adoka District Hospital Tuensang nung aniok. September 10 nü nisung pungu, September 11 nü pezü aser September 12 nü ka asüba osangtem angazüker ta NPYC-i ashi.

Tuensang district nung "MC Rum" ta ser yi tamajung batch ka ajemba ajanga nisungtem temang nung timtem adok asütsü ta bushisüngdang tenzükdang bushitetogo. Iba tatalokba sülen Director General of Police (DGP) Rupin Sharma-ia nübertem dang kuli tejangja maliba aser yi tamajung majemtsü tekümdangtsü metetdaksüogo.

Maneni, Mon, Mokokchung, Tuensang, Longleng, Kiphire, Shamator aser Noklak district tem asoshi 'urgent advisory warning' ka sangoktsüogo.

Iba tatalokba ajanga Nagaland Liquor Total Prohibition (NLTP) Act, 1989 mapa inyakba nung nübertem o atsüteptsü tenzüko.

Nagaland Legislative

Assembly nung ken o benoka jembidang özüngi memelaba yi ayokdak noklang aika aliba osang lemsatepogo. Dimapur aser Kohima nung yi ayokdak karbo cold-drink aser pan shops tenüng amer lapoka lir aser Kohima kübok wards 19 nung ibala mesükba yi ayokdak 500 tema lir ta assembly nung survey osang metetdaksüogo.

NPCC-i mangyimer aser aitsür

Dimapur, September 13, 2026 (TYO): Tuensang nung yi tamajung jemer nisung tugu asüba osang angashia temulung raksar aser tasür kibongtem den mangyim tejashi lemsateper ta Nagaland Pradesh Congress Committee (NPCC)-i metetdaksüogo.

Iba tatalokba ajanga Nagaland Liquor Total Prohibition Act mapa inyakba nung tasüngdangbatem arur. Nagaland ya "dry state" ka süra kodaser yi tamajung bener arua iba ama takoksa tulu bentsür aru ta NPCC-i asüngdangogo.

Excise & Prohibition Department, Police aser tanga enforcement agencies-i

teinyaksü tim meinyakba atema bushisüngdang asütsüla aser tasür kibongtem nem teyari agütsüba den mozü kidang anioka anepalurtem nem teyari agütsütsüla ta NPCC-i takhangba agütsüogo.

Iba atema forensic/laboratory findings aser bushisüngdang ajanga bushitetba osang yimjak nung metetdaksütsüla. Sorkari iba tebilemtsü khuret ya yi tajemertem nem dang magütsütsüla kechiyong özüngi noktanga liaka yi tamajung bener arua takoksa bentsür aruba atema sorkari nübertem tsüngdang langzütsüla ta Communication Department, NPCC-i metetdaksüogo.

State nung National Lok Adalat mapang ken o 380 dak tema bentetogo



Wokha nung Honibarn National Lok Adalat alidang tangokba noksa ka yangi angur.

Dimapur, Rongjui/Sept. 13 (TYO): Nagaland nung Honibarnü 3rd Quarterly National Lok Adalat mapang ken o 444 benoka jembir sen 5.25 crore jenjang ken o 387 benteta liasü.

Nagaland State Legal Services Authority (NSLSA) kübok district headquarters nung district legal services authorities (DLSAs) indang benches 11 amenoka ken o bentetba shilem 87 liasü.

Bentetba ken o tem rongnung pre-litigation stage nung ken o 318 liasü aser pending litigation nungi ken o 69 bentet. Pre-litigation stage nung aliba ken o tem ya bank recovery, loan recovery, aser telephone bills tem liasü aser pending cases nungya criminal compoundable offences, MACT, aser tanga civil disputes tem liasü.

DIMAPUR: Dimapur DLSA ajanga Lok Adalat ya district court nung ayongzüka liasü. Iba mapang Member Secretary Neiko Akami-i Lok Adalat ayongzüka tajangzük indang lemsatop aser stakeholders aser litigants tem dang iba ama sentong nung shilem agitsü ayongzüka liasü.

Dimapur nung presiding officers ya Longshithung Ezung, Chairman aser Julian, Secretary, Dimapur DLSA liasü aser panel lawyers tem conciliators ama PLVs temi yaritep.

Iba mapang ken o 152 bentet, kong bank recovery ken o 123, MACT ken o asem, BSNL ken o 25 aser pre-institution mediation and conciliation ken o ka, ajak senteper sen 1,71,30,176 jenjang ken o benteta liasü.

KOHIMA: Kohima DLSA ajanga Lok Adalat ya District Court Complex, Kohima nung ayongzük, kong Haiyale Kath, panel lawyer ajanga pela agizükba o jembir.

Kohima Lok Adalat nung

presiding officer ya Mezivolu T Therieh, Principal District and Sessions Judge & Chairperson, Kohima DLSA liasü.

Parnoki bank recovery ken o 52, BSNL ken o ti, commercial suit ka, NI Act ken o ka benteta liasü. Item ken o ya sen 1,93,72,236 jenjang liasü, kong conciliators ti panel lawyers ama inyak aser PLVs pezü-i yaritep.

MOKOKCHUNG: Mokokchung DLSA ajanga Lok Adalat sentong ya District Court Complex, Mokokchung nung ayongzüka agi. Iba sentong nung presiding officer ya Victo Sema, District and Sessions Judge-cum-Chairman liasü. Iba Lok Adalat nung Atenla Ao, JMFC aden kong Watitemjen, retainer lawyer; Temjenkokla, panel lawyer; Mapujungla; aser Chubarenla nungertem conciliators ama shilem agi.

Parnoki pre-litigation bank recovery ken o 11 benoka jembir sen 8,85,610 indang ken o ter bentettsü.

TUENSANG: Tuensang DLSA ajanga Lok Adalat ya District Court Complex, Tuensang nung agia liasü, kong Somet Chumden Chang, Principal District and Sessions Judge-cum-Chairman ya presiding officer liasü. Tsaliba, Judicial Magistrate First Class-cum-Secretary den P Herola, retainer lawyer aser Ayangla, panel lawyer nungertem conciliators ama inyak.

Iba sentong nung State Bank of India (SBI), Main Branch aser SBI Bazar Branch, aser Nagaland State Cooperative Bank (NSCB) nungi shilem agi. Parnoki sen 23,19,547 jenjang ken o benoka jembir aser sen 8,61,913 jenjang ken o pongu benteta liasü.

ZUNHEBOTO: Zunheboto DLSA ajanga Lok Adalat ya District Court Complex, Zunheboto nung agi,

kong presiding officers ya Atoka Achumi, District and Sessions Judge-cum-Chairman aser Vesutolu Therie, Judicial Magistrate First Class-cum-Secretary liasü aser conciliators ya Easter H Yephthomi aser Vilibo K Zhimo liasü.

Parnoki sen 20,63,645 indang pre-litigation bank recovery ken o pongu benoka jembir bentetja liasü.

MON: Mon DLSA ajanga Lok Adalat ya DLSA front office, Mon nung ayongzüka liasü, kong presiding officers ya Nokshei Kano, District and Sessions Judge-cum-Chairman aser Wokono Yhoshii, Chief Judicial Magistrate-cum-Secretary liasü aser conciliators ama Angun Konyak, retainer lawyer; N Mamon, Chief LADC; aser M Moba, Deputy LADC nungeri shilem agi.

Mon DLSA-i pre-litigation aser litigation bank recovery ken o 19 benoka jembir sen 48,78,450 jenjang ken o 16 tembangtsü.

WOKHA: Wokha DLSA ajanga Lok Adalat ya District Court, Wokha nung ayongzük, kong presiding officer Vitsino Iralu, Judicial Magistrate First Class-cum-Secretary liasü.

Panel lawyers Shanchobeni P Lotha aser Abigail Lotha na conciliators ama liasü aser Renbemo Tungoe, APP, Wokha; Libeni B Jungio, LADC; bank ketdangsürtem; aser PLVs tem aden.

Parnoki pre-litigation bank recovery ken o pongu benoka pezü tembangtsü. Iba den pending trial criminal compoundable ken o pongu benoka jembir asem tembangja liasü. Ajak agi sen 1,91,500 jenjang ken o parnoki bentetja liasü.

Kasaji Peren, Longleng, Kiphire aser Phek nunga Lok Adalat sentong ayongzüka agia liasü.

Manipur: CRPF dak injang khaloktsür ka puogo

Imphal, Rongjui/Sept. 13 (Agencies): Khonghampat Awang Leikai nung Central Reserve Police Force (CRPF) personnel dak injang khaloktsüba dak sendakba ken o nung Manipur police-i Hokulbarnü Sekmai Parao nungi arishi küm 56 tain Sheleibam Yaima puogo, ta ketdangsür temi ashi.

Mejangjaba nisung telok kati prangbong bener arua iba tesem nung aliba CRPF personnel dak September 10 nikongdang 5:20 ako meta injang khaloktsü. Iba lendong nung CRPF züngsem kata meyiru.

Iba lendong agütsürtem yagi security personnel dak injang ishika khaloktsü ta osang ajanga ashir.

Iba lendong atalokba sülen Sekmai Police Station nung ken o ka benoka police temi bushisüngdang tenzük.

Iba mapang police temi Maruti Alto gari (registration number MN05A-93320 ka ngutet, koba item lendong agütsür yagi amshia liasü. Parnoki gari kak-a bushiba



Khonghampat Awang Leikai nung Central Reserve Police Force (CRPF) personnel dak injang khaloktsüba ken o nung Manipur police-i Sheleibam Yaima apu.

mapang injang pondang tazüing ka nguteta liasü.

Pua alisang ya yangji aliba court kati bener ao aser asüngdangyatsü atema police ket nung anogo ti ayutsü totuyuba agütsü.

Ano tanüngba nisungtem jangjatettsü aser lendong agütsüba indang tejangja bushitettsü atema bushisüngdang sütar, ta police tanishir temi ashi.

Zunheboto DLSA-i PWDs atema medical camp ayongzük



Hokulbarn Zunhiboto jila nung Persons with Disabilities (PwDs) atema medical camp ka ayongzükdang tangokba noksa nung angur.

Dimapur, Rongjui/Sept. 13 (TYO): Zunheboto District Legal Services Authority (ZDLSA) ajanga Hezukhu Memorial District Hospital, Zunheboto den lungjemer September 11 nü Town Hall, Zunheboto nung Persons with Disabilities (PwDs) atema medical camp ka ayongzüka liasü.

Osang ajanga ashiba agi, matamabensar tem jangjateta medical professionals temi temang tendanger temsüa alir nem disability certificates agütsüba nung yariteptsü nükjidong nung iba camp ya ayongzüka liasü.

Iba sentong nungsa matamabensar nem agütsüba temeden aser tajangzük balala indang temetettsü den külemi ozüng dak sendakba nung tangazükba agüja liasü. Iba den külemi parnok nem angati legal services aser sorkar tajangzüktem angutsü atema teyari agütsü.

District & Sessions Judge, Zunheboto, and Chairman, ZDLSA, Atoka Achumi-i iba sentong ayongzüka nükjidong lemsatopdang, matamabensar

asoshi ochi obendang, healthcare aser teyari balala agütsütsü tongtipang lir ta ashi.

Pai legal, medical aser administrative institutions tsüngta teka amteper temsüa alirtem nem tim teyari agütsütsü asoshi inyaktsü nüngdakba indang ashi.

Sentong nung Medical Superintendent, District Hospital, Zunheboto, Keholi Chishi-ia o tatsüka jembidang matamabensar atema medical assessment aser mapang shidak nung healthcare services agütsütsü tongtipang lir ta ashi.

Iba camp nung ano medical mesüra legal teyari nüngdaka alirtem dang lenmang sayua yaritepa liasü.

Temsüa alirtem dang pei kinungertem mesüra anepalur den arua iba camp nung agütsüba medical, legal aser welfare service tem agitsü asoshi ajungshia liasü.

Iba sentong nung retainer lawyer Easter H Yephthomi menden liasü aser Judicial Magistrate and Secretary, ZDLSA, Vesutolu Therie-i melepzüng o jembia tembang.

Thenyizumi nung sorkar ketdangsür ana tushia amshi

Kohima, Rongjui/Sept. 13 (TYO): Honibarnü Thenyizumi Village Council ajanga Dr. Keveduyi Theyo, Principal Director, Health & Family Welfare Department, Government of Nagaland aser Kenesa Dawhuo, NPS, Commandant, 10th NAP (IR) Battalion, Zhadima na nem tetushi agütsüba sentong ka Community

Hall nung agia liasü.

Iba sentong ya yimtsüng nungi ketdangsür ana yagi pei wadang nung takok anguba asoshi tenüngsang agüja Thenyizumi Village Council-i ayongzüka liasü.

Sentong nung VDB Secretary Zacusa Thisa menden liasü aser C. Kroso Kezo, Pastor, TBC ajanga sentong tenzük sarasadem. Zhothiye Dawhuo,

VCC ajanga pela agizükba o jembia liasü.

Dr. Keveduyi Theyo aser Kenesa Dawhuo, NPS nati iba sentong nung o tatsütsü jembir.

Thefuseyi Poru, Catechist, TCC-i anir ketdangsür ana nem temoatsü meshija sarasadem aser sentong tembanga Rev. Veshoseyi Rhakho, Pastor, TCRC ajanga sarasadema liasü.

BRICS senden aliba mapang PM Modi-i jurila senden 15 amen



September 13, 2026 nü New Delhi nung BRICS senden nung Ato kilonser Narendra Modi, Russia Tir Vladimir Putin, China Tir Xi Jinping, Kazakhstan Tir Kassym-Jomart Tokayev, Indonesia Tir Prabowo Subianto, Egypt Tir Abdel Fattah el-Sisi aser linük balala nungi lenirtem tangokba noksa nung angur.

New Delhi, Rongjui/ September 13 (Agencies):

New Delhi nung anogo asemnü tashi BRICS senden aliba mapang nung Ato kilonser, Narendra Modi-i linük balala nungi lenirtem den jurila senden 15 menogo, ta ketdangsertem osang ka ajanga metetdaksü.

BRICS senden aliba mapang nung Modi-i Russia, China, Iran, Africa, Southeast Asia, Gulf aser tanga region balala nungi tongti lenirtem den jurila senden amenba mapang nung shishilembaba, investment, defence, energy, technology, connectivity aser tongtibang minerals sectors nung tesendaktep tajungba akümtsü atema jembia.

Paisa linük balala nungi lenirtem den regional aser International onüktem nung o lemtepa tebilemba lemsatepa liasü.

September 11 nü mezüing anogo nung Modi-i Russia Tir Vladimir Putin aser Iran Tir Masoud Pezeshkian na den jurila senden mena liasü.

Modi aser Putin nati India-Russia asalentong partnership atema jembiba den külemi linük ana tsüingda defence, energy, shishilembaba, infrastructure, technology aser civil nuclear energy sectors nung amalitepa inyakba jenjang asadang. Tenatisa Russia-Ukraine rara aser West Asia tensa atema jembia liasü.

Modi aser Iran Tir Masoud Pezeshkian na senden amenba mapang nung tenati linük ana tsüingda tesendaktep, Brics amalitep aser West Asia tensa

atema jembia.

Kasa anogo nungjisa Modi-i UN Secretary-General António Guterres den senden amen.

September 12 nü Modi-i Ethiopia Ato kilonser Abiy Ahmed Ali, Malaysia Ato kilonser Anwar Ibrahim, UAE Crown Prince Sheikh Khaled bin Mohamed bin Zayed Al Nahyan aser China Tir, Xi Jinping nung den jurila senden amen.

China Tir Xi aser Modi na senden amenba mapang nung lenir anati linük ana tsüingda tesendaktep atema jembiba den külemi arrtsülen mangatettep aliba atema jembia. Tenatisa arrtsülen yimjung aser shishilembaba tesendaktep tajungba akümtsü atema jembia.

Modi aser Malaysia Ato kilonser Anwar Ibrahim nati shishilembaba, investment, defence, semiconductors, infrastructure terenlok, digital rongsenkettzüing, energy aser fintech sectors nung amalitepa inyaksü jembia.

Modi aser Ethiopia Ato kilonser Abiy Ahmed Ali nati linük ana tsüingda tesendaktep tajungba akümtsü atema jembiba den külemi India-i Africa nung aliba linüktem den lenla balala nung inyaksama aruba metetdaksa liasü.

UAE Crown Prince Sheikh Khaled bin Mohamed bin Zayed Al Nahyan den senden amenba mapang nung India-UAE asalentong partnership asadang aser defence, technology, energy, tongtibang minerals aser connectivity tsütsü amalitep tajungba

akümtsü jembia.

September 13 nü Modi-i South Africa Tir Cyril Ramaphosa, Kazakh Tir Kassym-Jomart Tokayev, Philippine Tir Ferdinand R. Marcos Jr, Egypt Tir Abdel Fattah El-Sisi aser Burundian Tir Evariste Ndayishimiye nung den senden amen.

Modi-isa Uganda aser Nigeria na nungi lenirtema ajurua liasü.

Item senden nung India-i Africa, Central Asia aser Southeast Asia tesem balala nung aliba linüktem den tesendaktep ayuba aser lenla aika nung amalitepa inyakba jembia liasü.

Anogo asemnü tsüingda Modi-i linük balala nungi lenirtem den jurila senden 15 amenba dak alia pai lenirtem aika ajurua mapang tsütsütsü sensaksama liasü.

Tang alima nung mejangjaba tensa ka aliba mapang ka nung-West Asia nung rara aser Ukraine nung rara ajanga energy markets, tzüyim nung shishilembaba aser global supply chains raksaba agi linüktem aika rongsenkettzüing mejungi kongshir aliba mapang ka nung BRICS senden ya amen.

India nung BRICS senden ayonga akaba maongka agia anogo asemnü tsüingda India-i Russia aser Gulf den tesendaktep tajungba akümtsü atema jembia, China den tesendaktep yanglushitsü atema jembia aser Africa, Central Asia aser Southeast Asia nung India inyaksangshi jenjang tajungba akümtsü atema jembio.

NDA-i yimsüsüba state ajak nung UCC ozüing benoktsü: Amit Shah

New Delhi, Rongjui/ September 13 (Agencies): Amongnü Union Home Minister Amit Shah-i, 2029 küm matongdangsa BJP-i aniba NDA sorkar aliba state 21 prongla nung Uniform Civil Code (UCC) benoktsü, ta metetdaksü.

Paisa, UCC ya state aika nung benoka lir, ta metetdaksü.

Mumbai nung osangbenertem senden ka nung jembidang Shah-i, "Onoki state aika nung Uniform Civil Code (UCC) benokogo. 2029 küm matongdangsa onoki BJP-i aniba NDA sorkar aliba state 21 prongla nung UCC benoktsü," ta metetdaksü.

Shah-isa, sorkari kiralongra khenyongi magizükteter, ta metetdaksü.

"Surgical strikes, air strikes aser Operation Sindoor ama operations balala ajanga onoki kiralongra khenyongi magizüktetba mapatong benokogo, aser sector aika nung security kanga tongtibang kümdaktsüogo," ta pai metetdaksü.

Uniform Civil Code (UCC) ya senso ajak atema kasa

ozüingtem benokba lir. UCC kübok yimsü kecha mebendangi senso ajak atema kiyimba, balalulaba aser senmang amangba dak sendakba kasa ozüing benoker.

UCC ya ozüing kübok ajak kasa züingshitsü aser aser yimsü nung ajemdaker benokba ozüingtem melen ajak atema kasa ozüing benoktsü nükjidong nung lir.

Shah-isa, Ato kilonser Narendra Modi-i nübur tenzüka aruba sülen küm 25 ajungbamong nüingtem nung September 17 nungi October 17 tashi ita ka piyong linük tesem ajaklen "Seva Sankalp Abhiyan" amongtsü, ta metetdaksü.

Iba campaign ajanga district ajak, Lok Sabha aser Assembly constituency ajak, iba denji külemi polling booth ajak ayimjemsü.

Shah-i, "NDA teloktep, voluntary organisations aser linük nung nübur ajaki iba campaign nung shilem agitsü. Iba campaign ya Ato kilonser Modi asoba anogomong September 17 nü tenzüktsü," ta metetdaksü.



September 13, 2026 nü New Delhi nung senden ka amenba sülen Lok Sabha nung opposition lenir Rahul Gandhi, Malaysia Ato kilonser Anwar Ibrahim aser Congress MP, Priyanka Gandhi Vadra nung tangokba noksa nung angur.

Goa assembly election nung AAP aser GFP nati lokteper tokteptsü

New Delhi, September 13 (Agencies): 2027 Goa assembly election atema Aam Aadmi Party (AAP) aser Goa Forward Party (GFP) na longjemogo.

AAP national convenor Arvind Kejriwal-i, iba teloktep tasenba dang "Goa First" ajatsü, iba teloktep ya BJP mesüra Congress masüba teloktep ka lir, ta metetdaksü.

Kejriwal-i, BJP aser Congress na dak alia voters nem lenmang tasen ka agütsütsü nükjidong nung iba teloktep ya tenteter, ta metetdaksü.

Paisa, election mapang nung BJP aser Congress na tokteper, ajisüaka election sülenbo sorkar akümtsü atema party ana ya telung nung longjemer inyaker, ta metetdaksü.

"Goa First tentetsü atema Goa Forward Party aser Aam Aadmi Party na longjemogo. Iba teloktep ya Goa nem atangji lenmang ka agütsütsü atema lir," ta pai ashi.

"Goa nung aliba nüburtem anaben tashi ashiokdaksüogo. Parnok tasembenbubabo mashiokdaksütsü. Election mapang nung BJP aser Congress nati tokteptsüa akok,

saka sorkar akümtsü atema parnoki telung nung longjemadoker," ta pai ashi.

Züingsem 40 aliba Goa Legislative Assembly election ya sangküm March ita nung agitsü.

Goa nung BJP-i aniba sorkar aija Kejriwal-i, sorkar nung taoba mapang Congress lenirtem aika lir, aser ibaji ajanga iba sorkar ya atangji BJP sorkar mesüra Congress sorkar ta ashitsü makoker, ta metetdaksü.

"BJP sorkar nungji tesadangbo Congress nisungtem lir, aser ibaji ajanga iba ya BJP sorkar mesüra Congress sorkar ta tejangja meshiteter. Iba sorkar ya sen penpuba aser auer sorkar lir. Parnok atema tongtibangbaji 'Goa First' masü saka 'Pocket First' lir," ta pai metetdaksü.

Goa Forward Party ya taoba mapang deputy chief minister Vijai Sardesai-i aniba regional party ka lir. Tang assembly nung GFP nungi MLA ji pa dang lir.

Ano külen Goa assembly nung AAP nungia MLA ana dang lir. AAP MLA anaji Venzy Viegas aser Cruz Silva na lir.



September 13, 2026 nü Dehradun nung aliba Parade Ground nung nisung aika adenshia Old Pension scheme atema takhangba agüja longkak aيتدang tangokba noksa nung angur.



TIR YIMYIM YIMOBILE (EDITORIAL)

DIMAPUR MONDAY, SEPTEMBER (RONGJUI) 14, 2026

Asenok ajak tamakok

Naga yimten tebilemtsü tatembang küma latettsü mekokteti asenok rongnung telokang aika küma lemsaba tebilemtsü akoktsüba ya asenok o asenok na aitsütepba agi majungtsü saka asenok yimten tangatetba nung temulung meyiptsüla aser tebang agi asenok ajaki pei pei tamakok nangzük nung dang ajungtsü. Aji oda, Naga yimten tebilemtsü latettsüba ya onük tongtibangbo ana dang lir. Onük ana rongnungji ka Naga nung lushi India kübok Nagaland, Manipur, Assam aser Arunachal nung aliba aser Myanmar nung aliba Naga nung lushi dena yimten ka küboki aittsü aser ano tanga onük tongtibang kaji, Naga lima aser Naga nungertem ya bendanger kin shinga küboka melii laa la meyong yimten yimli aser temzüng ozüng lateter alitsü temeten indang jembibaya lir. Item temeten aser tejangraba onük ana atemaji, shitakba nungbo Naga Club-i 1929 küm Simon Commission nem tezüluba nung agütsüba küm nungi Naga nungertemi yimjung nung British India government den jembitsü tenzük saka kecha telangzüba magütsüi British nungertemi India yimten nem tashi agütsür oa adok, anungji Naga nungertemi India government dena yimjung nung kasa Naga yimten onük jembia arur mangaba agi, Naga nungertemi Naga National Council lenisüba nung 1951 küm Naga Plebiscite ayongzüka akabaa asenoki meteta lir aser iba sentong nung shilem agirtema karbo tanü tashi taküm alitsüa akok. Iba anogo nung Naga nung lushi shilem agirtem ajaki Naga nung lushi yimten ka küma melungjemyonga aser India nungi yimten balaka razüka moutetyonga, India telungjem kübok state balala ser alitsü jenjang danga ngutetra ta ser Naga People's Convention teloki 1960 küm India den jembi aser India-i Naga nung lushi nem state jenjangji agütsütsü mulunga "16 Point Agreement" ajanga Nagaland state aküm, ajisüaka Nagaland state-ji tang Nagaland nung aliba Naga kintem meyong dang aküm, kechiyong 16 Point Agreement nung renema liaka, Naga nungertemi Naga kintem ajak yimten ka kübok alitsüsa meinyaktet. Aji oda, tanü tashi NSCN teloktemi Naga yimten temeten ken o latettsü asoshi India den yimjung nung ken o jembiaaka, telok aika lemsaba dak alaka, Naga yimten nüchiso aser Naga lushi ajak yimten ka kübok alitsüba onüktembo tamakoktsü mapa amai kümadokogo. Iba tamakokji shinga telok meyonga masü saka asenok Naga nung lushi arok tamakok asütsü. Aji oda, tang tashi Naga yimten melatetteti aruba ya Naga Club tamakoka masü, Naga National Council tamakoka masü, Naga People's Convention nung 16 Point Agreement yanglurtem tamakoka masü aser NSCN teloktem tamakoka masü, saka asenok ajak tamakok lir. Atangji, iba Naga yimten tongtibang onük ana nung takok mengutetba tamakok ya shiba aser koba telok dang atongtsü? Naga Club nungi tenzüka tanü NSCN teloktem tashi 1929 nung Naga Club-i British India government nem agütsüba Naga yimten ken o dang jembia aruogo saka tamakok angur. Iba tensaji meteta, tanübo Naga yimten melatettetba tamakokji asenok ajaki agitsüla aser kati ka aitsütepa mekazüi "ni mesüra onok taia" ta mashiyonga, Naga Club, NNC, NPC aser NSCN telok shiai "onoki meinyaktetba atema kanga sasar' ta danga tesasaba ken o shitetra, ibaji Naga yimten kangshiba timtem ya aneptsü aser anentsü atema mozü tajung ka asütsü.

OLEMSABANG

TENSA TAJUNG NUNG ALIDANGBO SHIBAJI SHIBA AJI MEMETETER

~ L. Kika Pongener

(Yashi adok nungi...)

Alima nung nuburtem yimchi-yimjung nung temoatsü agi sunga aliba mapang nungpo kibong ajak aser nisung ajak pei chiyungtsübo peria kar amai asütsü. Ajisuaka, kodang linuk nung yawara aser yasa-tzüra tesashi aser takü arudir; idangji kibong kar aser nisung kar taka-tait aser pei peria akaba shisangtsü; saka kibong kar aser nisung karbo maka-mait aser sensakba tali shisangtsü. Alima ajunga nung COVID-19 wara tesashi agi tim-atemba mapang; alima ajak Lockdown ser chiyungtsü aser kechisarena agi anungakongba mapang nung-to....Kibong kar aser nisung kar taka-tait shisang-shisanga metetogo; saka kibong aika aser nisung aika 'o' agi rasa-a meshitet kanga-sa timtemogo. Iba ama yawara takü mapang taka-taiter aikati pei akaba nungi mukürui sensaker timtemer kibongtem nem angadi lenmang balala nung yariba tenuki ngua ajangshia aruogo. Ajisuaka, kaa-ita aliyungjia takar karibo kanga kürua timtemer sensaker kibongtem dang temeim mesayuba aser meyariba tenuki ngua ajangshia aruogo. Atangji, iba ama yawara mapang nungji takartem rongnunga temeim aliba aser toküru maliba takartem aser temeim maketba aser toküru takartem bendanga metettsü.

Tanela Tamangba-ren (Spiritual and Religious life) nunga; tensa mapang tajung nung alidang; tenla kidang tekülem sentep mapang nung aser Revival agiba mapang nungpo arogopur ajunga....Tanela nung tashi-tait aser tamang nung tashi-tait amai asütsü....Saka kodang taküm nung timtem toudhi kar agi tongdir; jenjang mejungi lidir; mesura tamang nung atsüngzüka (Backslide) aotsüsa temenen tatidang (Temptation) kar ajurudir....Idangjiang, tamang nung tashi-tait aser tanela nung tashi-tait....Ibaji bendanga metettsü. Arogo otsü nung; mezüng arogo tenzüka aodang; tamanger shiai pei akaba alu-kimong ka-ka ayok aser tenyartem dangi bener aru. Iba mapang 'Yosef' tamanger tajung ka....Pai pa akaba alu ka ayok aser teyokzüka ajangaji ochishia bener arua Peter nung lushi nem agütsü. Anungji Tenyartemi pa nem 'Tajungshiba chir' (Barnaba) ta tanabuba tenung ka agütsü. (T. Mapa-4:36-37). Ajisuaka, iba küsa mapang nung Anania aser Safira par kibong-ia par akaba alu ka ayok....Saka tesadangkabo miimzüka yur Tenyar-tem nem agütsü. Anungji par kibongpo; kinungpu o kinungtsü na prongla külemi tasüba atalok. (T. Mapa-5:1-5). Kodang mapa tajung kar inyakdir; mesura lokti nung tongtipang mapa kar atalokdir....Idangji, kar asoshi temoatsü asütsü; saka kar asoshibo atakadem-ang ajangzüksü.

Asen mimchir iba alima nung lia aodang; tensa mapang tajung-tamajung, tatsük-talem balala ajurua aor. Iba ama tensa mapang balala ajurua aodangji....Nisung karbo lokti aser nubur ajak asoshi akümdong amai nubur ajaki akümtsüba aliba; lia lia pei sasa lireper; nuburi tamang makatettsüsa küma aor. Kodang lokti nung tongtipang maparen kar atalokdir....Idangji, nisung karbo taküm tepiyong atema konang-naroküm tenung tajung aahzüksü....Saka nisung karbo taküm tepiyong nuburi tetla-tetshia jembitsüsa pei jakla ayoktsü. Ano kodang tongpang rara kar atalokdir....Idangji nisung kar nokinketer/temeranger aser walunir konang-naroküm ajangzüksü; saka karbo nuburi tetla-tetshitsüsa tenungmenuk-ang ajangzüksü. Anungji asenok taküm nung kechi komala tensa tia ka ajurudir ajuruaka; kanga shisa kaa, kanga junga shisadanga, kanga kümdanga; temoatsü aser tenung tajung ajangzüksü melena; lokti menen khu/nungmen aseni mabentsüsa; kanga shisa kaa mapa tajung inyaksüla. Aseni inyakba mapa ajakji; tajung suaka; tamajung suaka; kenu yimjak nung jungkai adoktsü. Anungji asenok alima aser lokti raksar ka masü; saka teyanglur ka-ka asütsü ajangshir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

CTBA-i 1976 küm Revival sülen küm 50 ajungbamong among



Changtongya town Baptist Arogo (CTBA) revival sentong nung adenertem kar noksa nung angur.

Changtongya (Mokokchung), Rongjui/September 13 (TYO): Changtongya Town Baptist Church (CTBA)-i September 11-13, 2026 anogotem nung revival sentong ka ayongzüka tamangertem aika temoatsü angu aser aikati Khrista nem taküm bendanga agütsüshiogo. Revival programme ji Arogo calendar nunga züngoka liasü. 1976 küm Changtongya town nung revival milak jangruba sülen taküm küm 50 ajungbamong nüngtem nung iba sentong ya ayongzüka agiogo. Nagaland puti otsü nung 1970s mapang nung tanela asentenshi milak tulu jangruba ya mamatettsü otsü ka liasü. Iba mapang nungji Tanela Temeshi ajanga mapa tulu inyaka tamangertem aikati sayatenya mapa inyak aser

aikati Khrista agizüka liasü. Iba mapang nungji revival milak mezüng jangruba Arogotem rongnung Changtongya Town Baptist Arogo-a densema liasü. Revival sentong omenji Tenünsang Ken 85:6 nung ajemdaker, "Nü nüburtemi Nü dak pelateptsüsa Nai onok asentenshi mesütsüli ma?" liasü. Iba sentong nung tongti o jembirji International Evangelistic Fellowship (IEF) Tir, Dr. Chujang Aier liasü. Arogo balala nungi tanela pusemertemi pa den yaritepa liasü. Iba sentong nung Yisu Khrista dak tashi aliba ajanga taküm melenshiba taküm kuli aika lemsatep aser ibaji ajanga sentong nung adenertem tanela nung ajungmesoa liasü.

Taoba mapang CTBA nung pastor, Rev. M. I. Luin'er jala, Asangla Luen-ia Tanela Temeshi tashi indang kuli süa liasü. Laisa akhidang (1970s) revival dak sendakba 'memento' ka CTBA nem agütsü. Revival tatembangbuba anogo nung temoatsü sentep sentong tembangba sülen Mongsenyimti Compound Baptist Arogo nung pastor, Sashi Kichu leniba nung taneptsüba sentong ka agia liasü, aser iba sentong nungji Changtongya jila aser temeket nungi aruba shirangertem atema Healing team-i sarasademja liasü. Shi aser tanela naprongla nung taneptsüba aginertemi sarasademertem ajurua Khrista ajanga taneptsüba meshia temoatsü ngua liasü.

Nepal nung Khristantem anema inyakba kanga bulua akümer

September 13, 2026: Tawa Nepal nung ajungben tzümetsüng lendong tulu ataloka nisung 1,000 dak tali asü aser tzümetsüng ajanga Tenla ki 20 shi raksatsür lia ano Khristantem atema tensa tamajungba dang akümer. Christian Solidarity International (CSI) nung International Communications nung tongti, Joel Veldkamp-i, Nepal nung aliba Arogo ka nungbo züngsem 80 shi talidak ki makai kümogo, ta metetdaksü. CSI-i Nepal nung tzümetsüng agi kongshiba nüburtem nem chiyungtsü, sü, merla-sü aser merükmejuba osettem densema teyari balala agütsüdar. Veldkamp-isa, tang Nepal linük nung tzümetsüng lendong tulu ataloker lia iba linük nung Khristantem reshikangshiba ano kanga bulua kumdar, ta metetdaksü. Paisa, "Tesüiba küm 10 tsüngda Nepal nung Khristantem kanga reshikangshiba onoki

jangjaogo. Tamalenbo iba linük nung Khristantem reshikangshibaji tebilemtsü tulukabo masü liasü, aser tanü-a India mesüra Pakistan, mesüra anasa aliba linüktem nung reshikangshiba ama masü. Ajisüaka tangbo Nepal nung yimsü meyipdaksüba anema ozüng ka lir, anungji tangbo nisung kar yimsü meyipdaksütsüji ozüng alema inyakba mapa ka kümogo," ta metetdaksü. Veldkamp-i, iba ya meimchir temeden anema inyakba lir aser iba ozüng ya pastor tem aser missionary tem anema ken o akatsü atema amshir, ta metetdaksü. "Yimsü meyipdaksüba atema tai tonglokja Khristantem tepuokdak ayuba kanga bulua kumdar. Khrista osangtajung lemsatepba ajanga legal tsütsü timtem ajurutsüa akok," ta pai ashi. Alima nung Hindu nütsüng teimba aliba linük anaji India aser Nepal na lir. 2008 küm tashi Nepal ya Hindu linük ka

liasü saka tangbo federal republic ka kümogo. Ajisüaka tamalen ama ano tanaben Hindu linük ka akümstsü atema akhanger; aser ibaji Khristantem atema tebilemtsü onük ka lir, ta paisa metetdaksü. "Nepal linük temzüng melenshia iba linük ya tanaben Hindu linük akümstsü atema merangdar. Tang ama tensa ka nung iba linük ya Hindu linük ka kümra Khristantem ano taliba reshikangshitsü. Tenla kitem amakba kanga bulua akümstsü, kechiyong iba linük ya Khristantem meyong masütsü," ta pai metetdaksü. "Tang-tangbo Khristantem anema inyakba atalokdang Khristantemi 'Iba linük ya secular linük ka aser iba linük ya ajak meyong' ta shitettsü. Ajisüaka Hindu linük ka kümra Khristantem tejembitsü o makai akümstsü," ta shia Veldkamp-i alima nung tamangertem ajak dang Nepal nung Arogo atema sarasademjang, ta mepishi.

ANOGO ABEN TSÜNGREM DEN

Inyakyim mesüra nisung

"Aji asünung bendangertemi pei temulung uluba nung jajaba ama nenoki ano mejajatsüla" (Ef. 4: 17).

E.M. Bounds-i sarasadem indang züluba nung yamai zülusem: "Arogoi tajungba inyakyim bushir; Tsüngremi nisung tajungba bushir." Tenzükba mapa nung asen sobaliba den apet melenshia inyakbaji junger. Saka ibaji asenoki Lai tesayuba kübok inyaktsüla. John Blanchardi tekümdangtsü o ka yamai agütsür - "Inyakyim bendenloktsü asoshi osangji agienadoktsüba jenjang nung na kodanga teli".

Tasaji Tanela Temeshi ajanga meshitettsü akok - Anitet (31:1-5). Zerubbabel-ji tasa tajung asateta inyaker tajung ka liasü. Aji saka, pa dangi Kibuba oji "Tashi agi masü, mesüra ain agi masü, saka kü Tanela ajanga aru." (Zak. 4:6). Tangar dang nungi tajungba sayutsüngiteter tali tekümdangtsü mesüra Tsüngremi amshiba nisung masü saka o jembir tulur / nisung ka dang akümstsü. Leonard Ravenhill-i pa kaket nung yamai zülü: "Ne sempet (Talent) sayutsü asoshi sayutsüngidak sabangji dokan kichiba asütsü akok".

Yimjak nung ken ateneri teka anapronglai microphones nung amer microphones anasa tebang yur ken atener. Saka sayutsüngir teka külen sadoka melira Laishiba koda lapoka sayutsüngitsü ? Tangar mulung nung mesotstsü atema sayutsüngi masür saka angatetdaksütsü asoshi sayutsüngir. Yisui telok dang asüngdang - "Saka nenoki kechi ajitsü ao? Süoshi tanük sobuba nisung ka ajitsüba asü? ainkar ka ajitsü asü? Au, ni nenok dang ashir, "Ainkar danga kanga taoba" (Mt. 11 :8,9).



OFFICE OF THE
TULI TOWN BAPTIST AROGO
P.O. Tuli, Pin-798618
District: - Mokokchung: Nagaland.
Ref No. TBTA No 2026/36
Dated 07/09/2026
Molungnen O

Meyimlaba mapang aser Anogo ka 19th July 2026. Tzümetsung lendong ajanga Tuli Town Baptist Arogo Tenlaki aser Santem kibong kar dak takoksa aser tesamaba lendong tolu ajurua shisabolu tia nung alidang nubur aikati sarasadem aser nubu rongsen tolu ajanga yariba asoshi nenok ajak dang kanga pelar nenok dangi tsungdong arua pelaba melemsateptet nung iba osang ajanga Arogoi mamatetba tepela lemsateper.

Arogo ase Kija kibongtem tenung.

1. Luyong Baptist Arogo	10.000
2. Merangkong Baptist Arogo	10.000
3. Shri, A.Pangjung. MLA	20.000
4. Tuli Area Coal Mining Contractors Association	10.000
5. Molungyimsen Baptist Arogo	15.000
6. Langpangkong Pastors Fellowship	5.000
7. Konyak Baptist Fellowship Tuli	2.000
8. Police Baptist Fellowship Tuli	10.000
9. Chungtia Baptist Arogo	25.000
10. Mokokchung Town Baptist Arogo	50.000
11. Old Doidam Baptist Church (Arunachal)	3.000
12. Ongpangkong ArogoTenzuker Telungjem	4.000
13. Ao Baptist Arogo Mungdang (ABAM)	2.20.000



(Rev. S. Moji Aier)
Pastor
Tuli Town Baptist Arogo



Toshi Jamir
Secretary
Tuli Town Baptist Arogo

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Asüngdangdong

(n) tangar shisa agidak, ajak atema asüngdangdak (knowledgeable person)

* Ozü yim ya ajak atema asüngdangdong lir.

Atah

(exclam) süngmanga langzüba (expression of surprise)

* Atah ! yamaji atalok na ?

OLONG PAITEP # 7649

1		2			3		4		5
				6		7			
8									
						9			
			10						
11									12
					13			14	
15									
16							17		

TIPIEN

- Nüji masü - (4)
- Techinütsüka - (6)
- Aketa shirangba - (5)
- Pi - (6)
- Amena - (5)
- Kinü - (5)
- Tanang masü - (5)
- Lenmang - (6)
- Nübo tedi - (5)
- Tuoshi - (6)
- Shiruru apuba temenatsü - (4)

LANGTSÜNGLEN

- Jila tulu - (5)
- Sarasademdang tembang - (4)
- Tarutsü indang ashirtem - (6)
- Alia - (5)
- Mojing - (5)
- Tai inyakba metet - (5)
- Medemer chijiba - (6)
- Tatokba / Amadok - (5)
- Anüngdang masü - (5)
- Jabaso masü - (4)

OLONG PAITEP # 7648 TELANGZÜBA**TIPIEN :**

- Tesangra, 5. Mungo, 7. Kisen,
- Salem, 12. Semki, 14. Kilem,
- Kensü, 16. Sangpang.

LANGTSÜNGLEN :

- Temesen, 2. Raksa, 3. Aon,
- Aso, 6. Nile, 9. Alizüng,
- Omen, 11. Lemta, 13. Ola,
- Kin.

NAI-A YA METETTER

Jindal Steel Limited-i CSIR-Central Road Research Institute (CSIR-CRRI) den yaritepa "Longest Road Built Exclusively with Processed Steel Slag Aggregates" yangluba atema Guinness World Record kuli nguogo. Kilometre 1.85 talang four-lane lenmang ya Raigarh, Chhattisgarh nung yanglu aser parnoki EAF steel slag 200,000 tonnes shi amshia yangluogo.

Manipur nung fuel tanker drivers-i lungkak aiter

Imphal, September 13, 2026

(Agencies): All-Manipur Petroleum Products Drivers' Association-i Imphal Airport anasa Malom Oil Depot kishizüing nung mener lungkak aitogo.

National Highway 37 (NH-37) nung fuel tankers amakba atema security akangshitsü aser sorkar nungi tenangzükba meshia parnoki lungkak ait.

September 10 nü Noney district nung petroleum convoy ka amakba sülen parnoki "steering-down" strike tenzüka agir. Iba tatalokba nung driver aika yiru aser transport workers-i parnok taküm lendong nungi kümzüka ayutsü mechi nung maparen anen.

Driver temi "Drivers are not ATM booths" aser "Save our drivers, save Manipur" züluba placards amer lungkak ait.

Parnokisa departmental inquiry ka asütsü kechiyong convoy amakba nung security maparen meshitak inyakba lir ta akhangar.

Noney Bridge anasa lendong atalokba tesem nung kechiba security peria melii petroleum convoy senzüdaksü ta All-Manipur Petroleum Products Drivers' Association-i ashishir.

Manipur nung kin ajaki supply lines nung teka maitüsü ayongzüker kechiyong petroleum drivers ajanga nübortem asoshi essential

service nung teyari agütsür ta parnokisa ashi.

All-Manipur Petroleum Products Drivers' Association-i sorkar nungi Gazette notification kati nungita formal safety guarantee ka meshir.

Lendong balala nung driver tem yiruba aser garitem raksatsüba atema senotsü teyari parnokisa meshiogo.

Mokdang mapang petroleum convoys atema Standard Operating Procedure (SOP) akangshitsü parnokisa takhangba agütsür aser essential supplies abenba garitem dang tashiyim agi sen meshiba aser amakba anema maparen akanghitsu metetdaksüogo.

Meghalaya PHCs aseme 'national quality certification' angu

Shillong, September 13, 2026 (Agencies): Meghalaya nung primary health centres aseme National Quality Assurance Standards (NQAS) certification nguogo.

Item primary health centres-i lateta aliba healthcare quality standards ama inyakshangshiba atema iba naroküm angu.

Ri-Bhoi nung Umden Primary Health Centre (PHC), West Khasi Hills nung Dongki

Ingding PHC aser East Khasi Hills nung Laitryngew PHC nem certificate agütsü.

National Health Systems Resource Centre (NHSRC) indang NQAS framework kübok asadangba sülen ang iba naroküm agütsüogo.

PHCs aseme tongtipang maparen trok- outpatient department (OPD), labour room, inpatient department (IPD), laboratory, National Health

Programmes (NHP) aser general administration nung inyakshim lateta aliba ama liasü.

Umden PHC ajanga score teimtiba angu aser ibaji 94.97% liasü. Parnok sülen Dongki Ingding PHC-i 91.56% aser Laitryngew PHC-i 89.21% angu.

PHCs asem nung medical officers aser staff teamwork aser tenangzükba atema tenüngsang agütsüogo.

Arunachal nung NSCN-K (Ang Mai) telungpur ka apu

Dibrugarh, September 13,

2026 (Agencies): Arunachal Pradesh kübok Longding district nung sepaitemi NSCN-K (Ang Mai) züngsem ka puogo.

Iba nisung ya arishi küm 30 tain Lieutenant Pigang Gangsa lir aser pa Votnu nunger ta jangjaogo.

Gangsa ket nungi 7.65 mm pistol ka, magazine ka aser injangtem ngutetogo ta

sepaitemi ashi.

Sepaitemi Arunachal Pradesh kübok anüdoklen tsütsü counter-insurgency operations ulushia inyaker aser Naga telungpur telok balala nungi züngsemtem puogo.

Tirap-Longding-Changlang (TLC) region nung tashiyim agi sen saruba aser nisungtem pur aoba khuret kanga ataloker kechiyong telungpurtemi item

mapa inyakba senotsü bendener.

"Item teloktem ya Myanmar nung tesepe amenoka lir aser tashiyim agi sen meshiba aser nisung pur aoba ajanga senotsü bendener" ta ketdangsürtemi ashi.

Tirap, Longding aser Changlang nung Naga telungpur telok balala aliba ajanga security agencies-i iba tesem nung temulung agüja mapa inyakba arur.



OFFICE OF THE

VILLAGE COUNCIL, CHANGKI

MANGKOLEMBA SUB-DIVISION, MOKOKCHUNG DISTRICT

P.O., CHANGKI, NAGALAND.

SANGDONGER

Tawa whatsapp aser social media platform nung tapak (page) pezü aketba tezüluba ka, tezülur tenüng maket saka "NATIONAL HIGHWAY 702D ASER CHANGKI / CHANGKI-AO SENDEN ASER NH 702D" title/nüngja agütsüa zülur prokshiba Changki Yimden-i ngugo.

Tezülur tenüng magütsüi Changki tenüng amshia ken-o bendenloka zülubaji ashi-külak mapa aser lokti nung makmak- shimak, pesaberong adokdaksütsü nükjidong nung inyakba mapa.

Anungji, iba ashi-külak mapa Changki yimden-i khu-khua aitsür aser tezülur aser social media nung shibai belenshi, tatem tashi büshia temerenshi talang agütsütsü.

Maneni, iba tezülubaji shingai-a social media mesüra print media nung mamshitsü Changki yimden ajanga metetdaksür. Aibelener nem tapet temerenshi agütsütsü.

Sd/-

Tsüpongtsüngba Changkiri

CHAIRMAN

VILLAGE COUNCIL,

CHANGKI

Sd/-

Longmongri

SECRETARY

VILLAGE COUNCIL,

CHANGKI

Indonesia rong samaba nung nisung trok asü, 107 kumzük



Surabaya, Rongjui/Sept. 13 (Agencies): Java Sea nung timtem ajuruba Indonesian passenger rong ka nung nisung trok süogo aser 107 kumzükogo, ta Indonesia indang search and rescue agency ajanga ashi.

Virgo Transport 8 den osang agitepba samaba sülen search and rescue tenzük, kong nisung 243 mena liasü aser tzüüsang mopung tamajung ajurua liasü, ta ketdangsüri ashi.

Tanüngba passengers tem bushiba manener.

Rong ya Surabaya nungi South Kalimantan nung Banjarmasin yimti-i aorba liasü aser Deobar anepdang 2:00 ako meta Banjarmasin south tsütsü kilometer 150 shi pilar tesüsa osang agitepa liasü.

Rong ketdangsür PT Virgo nungi timtem ajuruba osang mezügbuba ya anepdang 4:10 ako meta ketdangsür dangi aru.

Rong ya Honibarnep 10:33 ako meta Surabaya nungi apuso aser Deobar nikongdang 2:00 ako nung Banjarmasin atongtsü liasü, ta ashir.

Indonesia indang search and

rescue agency, navy, maritime police aser tanga telok lungiemer iba rong nung alirtem kumzüktsü mera agi tenzük.

Iba tesemi rong tem aser helicopter ka yoka lir, aser rescue operation nung sepa 280 shilem agir.

Java Sea nung aliba rong ajunga dang iba lendong atalokba osang agütsüogo.

Lendong ketdangsütsü atema Deobarnep Trisakti Port nung operations port ka amenokogo.

Rong nungya passengers 213 aser rong ketdangsür 30 liasü. Item nungi nisung 130 samar bushir.

Kinungertem Surabaya nung aliba Tanjung Perak Port nung adenshia pei kinunger adianurtem osang bushitepba mapang lir.

Taoba ita Indonesia nung Madura asetkong anasa rong ka nung mi adoka nisung pongu asüba sülen tang iba lendong ya ataloker.

Indonesian archipelago nungya setkong 17,000 dak tema lir aser nüburtem senzüsempongtsü atema rong kanga amshir.

BLA-i Pakistan Army convoy amak, sepa 20 dak tema asü

Kashari, Rongjui/Sept. 13 (Agencies): Pakistan nung Balochistan province kübok Lasbela district nung aliba N-25 National Highway nung Pakistan Army convoy ka dak amak, ta security osangtem ajanga ashi.

Iba lendong nung Pakistani Army personnel 23 dak tema tepset südi ta ashir aser aika yiru, ta osangtem ajanga ashi.

Lasbela nung aliba Kashari area nung Frontier Force gari 15 shi aliba convoy ka nung tenük yoker bomb pokdaksüba sülen sepaitem asüba osang ya angashir.

Osang ajanga ashiba agi, iba lendong atalokba mapang security forces indang gar ka nung mi senloksü.

Yirur aliba sepaitem Bela camp-i anir ao, aser lendong atalokba sülen N-25 highway ya shibanga lir.

Pakistani security forces temi iba tesem nung 'search and clearance operations' tenzükogo.

Iba lendong ya Baloch Liberation Army (BLA) ajanga agütsü ta ashir, shirnoki Balochistan tesem ajungalen Pakistani security forces aser state installations anema azüdokshiba ita ishika tesashiba kumogo.

Lasbela nung iba lendong atalokba ya tebilemtsü kanga tulu, kechiaser iba province nung N-25 ya tongtipang lenmang ka lir, koba agi Karachi aser Quetta sendakteper aser Balochistan nung tongtipang tesemtem ajanga aor.

Baloch telungpuri highways nung senzüba security convoys dak lendong agütsüba ya mapang shia ataloker, kong telungpur temi mitkar senzüsempongba nung tenük yoker aser tongtipang transport lenmang nung timtem agütsür.

Balochistan nung azüdokshi lendong tesashiba akumba mapang tang tesüsa iba lendong ya ajurur.

BLA yagi iba province tesem balala nung

security personnel, sorkar indang facilities, transport infrastructure aser tanga tongtipang tesemtem nung tenük yoker maka arur.

Iba telok yagi tesem balala nung amaksü aser senzüsemponga aliba security forces dak maktettsü tashi aliba tali sayur.

Lasbela aser iba anasa tzüikum aser highway belt ya Pakistan asoshi kanga tongtipang, kechiaser item ya Karachi anasa aser lenmangtem ya rongnendak yimti aser anüolen Balochistan aser province nung tanga tesemtem den sendakteper.

Anungji N-25 nung mapang talangka timtem agütsüba ajanga security senzüsempongba, civilian aser commercial traffic nung kongshir.

Baloch separatist telungpur temi Pakistani security forces nem tebilemtsü tanen makai agütsüba mapang Lasbela lendong ya ataloker.

Iraq-i drone yokba sabang ka puteta azüokogo

Baghdad, Rongjui/September 13 (Agencies): Iraq nunger ketdangsürtemi ashiba agi, parnok indang security force temi Saudi Arabia indang East-West totzü pipeline amaksü atema amshiba drone yokba sabang ka nguteta azüokogo.

State meyong Iraqi News Agency (INA)-i Honibarnü sangdong ka ajanga, Iraq indang Security Media Cell tekolakba Lieutenant General Saad Maan-i, itangiertem aser security task force-i drone yokdang amshiba hadirtem puteta rakzüiker yuogo, ta ashiba metetdakja liasü.

Paisa, Saudi nung totzü pipeline amakertem ya jangjatsü atema forensic aser technical expert tem maneni inyakdar ta ashiba den, Iran-i bushisüngdang nung dena tengutetbatem asadangtsü asoshi mepeshiba Iraq indang commander-in-chief-i temelaba agütsüogo, ta shisem.

Baghdad-i itangitertem osang lemsateptsü atema Saudi nunger ketdangsürtem den indang indanga sendaktepa arudar, ta Maan-i ashi.

"Iraq-i ozü linük amaksü aliba nokdangtsü atema jenjang agiba dang masü saka ozü linük ya tanga linük ka amaksü atema tamendakdak ka ama mamshidaksütsü mesüra Iraq ya proxy rara ka nung shilem magütsü," ta pai ashiba INA-isa metetdaksü.

Brehostibarnü Riyadh aser Medina tesem nung East-West pipeline ya Iraq nungi yokba drone tem agi amakba sülen nisung ishika yiruogo, ta Saudi nunger ketdangsürtemi ashi.

Pipeline koba ajanga alima totzü supply shilem 4 nungi 5 tashi belener, aser koba ajanga Strait of Hormuz adena totzü bener mesenzütsü atema Saudi Arabia nem teyari agütsür, iba

pipeline ya amakba sülen kümdangshia atatsü atema khen asoshi shibanga ata liasü.

Baghdad-i mepeshiba sülen Saudi-isa, parnoki tang atemabo mang mayangtsü atema telemtetba agiogo, ta ashi.

Saudi nunger ketdangsürtemi drone tem ya southeastern Iraq kübok Maysan province nungi yok ta bushiteter liasü.

Maysan province ya Iran den arrtsü nung lir, kong Iran den sendaktepa aliba telungpurtem inyaksangshir.

Al Jazeera osangbener Mohammed Rammal-i ashiba agi, Iraq nunger ketdangsürtemi, Amara anütoklen Sheeb crossing anasa northeastern Maysan province kübok arrtsü nung aliba al-Tayeb district koba Duwayrij ayong aser Tayeb asetkong agi longbaner lir, iba tesem nungi drone tem yok asütsü ta asateta liasü.

Rammal-i ashiba agi, drone yok asütsü ta temulung melema bilemba tesem ya Medina nungi kilometer 1,100 aser Riyadh nungi kilometer 800 pilar lir.

Drone tem ya tactical drone masü saka long-range, advance drone tem asütsü ta amanger.

Drone tem agi Saudi indang pipeline amakba sülen Iraq nunger ketdangsürtemi security inspection atema Shalamcheh, Chazabeh aser Mandali densema Iran den arrtsü nung crossing tem khen atema shibangtsü, saka humanitarian traffic atema arrtsü nung crossing tem ya terarabo lapoker lir.

Maneni item tesemtem amakba sülen Iraq Ato kilonser Ali al-Zaidi-i Maysan province indang commander densema military commander tem aika melenshitsuogo.

Al Jazeera correspondent Samer al-Kubaisi-i ashiba agi,

mapa nungi anentsürtem rongnung Maysan operations commander aser province indang police tekolakba densema lir.

Saudi nung item tesemtem amakba sülen province nung inyaka aliba security commander tem telok ka tang bushisüngdang südar, ta Samer-isa shisem.

Political analyst Salim Zakhour-i Al Jazeera dang ashiba agi, Saudi Arabia-i mang ayangtsü asoshi jenjang magi, saka parnoki Iraq sorkar den angatettep ken o bentettsü asoshi jenjang agia liasü.

Paisa, Saudi Arabia nung tesüiba anogo shika tatalokbatemya kanga dang tebenja lir, kechiyong Houthi teloki Bab al-Mandeb lenia tesem balala atsüngyonga odar, koba parnok asoshi tetsükdaksü ka asütsü.

Iba ajanga Riyadh-i linük kümzüka ayutsü atema jenjang agitsüsa kümogo, aser linük nung facility balala amaksü merangba nokdangtsü asoshi jenjang tapet agitsüsa kümogo, ta Zakhour-i ashi.

Maneni Yemen nung Iran-i teyari agütsüba Houthi telok Temerem Tzüyim nung rongtem mesenzütsü atema Saudi nem tenokdangba agütsür aliba ajanga parnok rongtem senzüsenpong nung tetsükdaksü adoker lir.

Saudi-i par linük kümzüka ayutsü atema US danga military teyari meshiogo.

Strait of Hormuz shibanger aliba den tang Temerem Tzüyim nunga rongtem senzüsenpong nokdangtetra Iran asoshi rara nung takok ka asütsü, kechiyong parnoki totzü shibelenba nokdanga alima kintem nem US anema jenjang agidaksütsü meranga arudar.

Elena Rybakina-i US Open tetsür kija asaya kokogo



Rongjui/September 13, 2026 (Agencies): Elena Rybakina-i US Open tetsür kija asaya final nung tesüiba küm ana iba asayamung koker alila Aryna ??Sabalenka 6-4??, 5-7, 6-2 agi kokogo.

Iba asaya akokba ya la asoshi Grand Slam asembuba akokba liasü aser iba den la tetsürtem rongnung world number 1 asayar kümogo.

Russia nung asoba Kazakh tsürla yagi kanga süngjema asayaba ajanga Sabalenka Flushing Meadows nung asaya 20 tashi khien danga tamakok mongui asaya arua aliba koktetogo. Taküm iba asayamung ya akok asüba Belarus tsürla ya Serena Williams aser ??Chris Evert na sülen US Open tetsür kija asaya küm asem atonga akokba tasembuba asayar kümer lila,

saka lai Rybakina majangtet.

Asayamung metenzük tsüingda tetsüing teloktep yiruba ajanga Rybakina masayatetsü akok ta bilema liasü, saka arishi küm 27 tain asayar yagi iba ya tesülen toktsür US Open title benogo, koba la asoshi taküm Grand Slam tanabuba akokba asütsü. Lai taküm Australian Open kokogo aser 2022 küma Wimbledon koker liasü.

Final asaya nung Rybakina-i groundstroke tem kanga junga asaya saka tetenzüklen Sabalenka nongshia masayatet, shibai serves kanga junga oteta ajang ajanga asaya liasü.

Asaya nung Sabalenka-i double fault ka menaba sülen Rybakina ya 3-2 agi tejakdang aküm. Asaya nung shot kar junga masayatetba ajanga Sabalenka tezü danga aküm aser shot masayatetba shia la

tezü tadangba akümba nguogo. Kasa mapang nung Rybakina-i kanga süngjemer asaya-a mezüingbuba set akok.

Tanabuba set tom ka tashi nung Rybakina-i junga masayateti akümba sülen Sabalenka nem timla agütsü aser drop shot tajung ka den backhand crosscourt winner ka zükloksüba sülen lai tanabuba set akok.

Deciding asayaba mapang Sabalenka-i backhand winner ka züklokja mezüingbuba game akokba sülen tepela nung ola tulu adoka liasü.

Ajisüaka Rybakina-i la sempet tajung sayua kanga junga asaya aser la yakta dang 5-2 agi tejakdang aküm aser mapang tatsüka dang lir asaya kokatok. Sabalenka taküm Grand Slam ka danga mekokteti tembangogo.

Tanvi Patri-i Asian U17 tetsür kija asaya koka otsü tasen yangluogo

Rongjui/September 13, 2026 (Agencies): India tsür Tanvi Patri-i, September 13 nü Badminton Asia U17 & U15 Junior Championships 2026 nung Under 17 tetsür kija asaya kokogo. Iba asayamung ya Chengdu Wenjiang Gymnasium, China nung asaya liasü.

India tsürtem rongnungi Diksha Sudhar sülen Tanvi ya iba title abenba asayar tanabula kümogo. Diksha Sudhar-i 2025 küm U17 title ya bena la India tsürtem rongnungi iba asayamung akokba mezüingbuba asayar kümer liasü.

Deobarnü final asaya nung India tsürla yagi külem India tsür aser 2025 Asian U15 champion Shaina Manimuthu 11-15, 15-10, 15-12 agi koka liasü. Final ya 3x15 scoring format nung asaya aser Tanvi-i mezüingbuba game mekokaka tanungba game ana ya koka title benogo.

U17 Asian title abenba sülen Tanvi ya India tsürtem rongnungi continental junior championships nung U15 aser U17 naprongla tetsür kija asaya akokba mezüingbuba asayar kümogo. Lai 2024 küm U15 title bener liasü.

Arishi küm 15 tain Odisha nungi asayar yagi asayamung tepeyong kanga junga asaya-a final tonga asayaba mapang China tsür asem tashi koka liasü.

Tanga asayartem atema China ya asayaba tesem tasen ka asütsü saka Tanvi atemabo China ya linük tasen ka masü, kechiyong la Kunshan yimti nung tsürapurtem den aliba mapang badminton asaya tenzüka liasü. La mezüing asaya tenzüka mapang China nunger coach Jiang Yong Yi, Zhang Lei aser Wu nungeri teyagi agütsü aser iba sülen la 2020 küm India-i meyipa aru.

Round of 64 atema bye anguba sülen Tanvi-i la asoshi mezüingbuba asaya nung China tsür Zhou Jing Li kanga meranga asayar 18-16, 12-15, 15-13 agi koka liasü.

Iba sülen la Japan tsür Shizuku Kashio den asaya lai 15-9, 15-12 agi koka quarterfinals tongteta liasü.

Quarter nung la Lin Heng Men den asaya koba lai 15-8, 15-8 agi ayong ayonga akok.

Semifinal nung la China tsür Yu Ying Gui den asaya. Iba asaya nung Tanvi-i kanga meranga asayarang asaya 15-9, 11-15, 15-11 agi koka liasü.

Shaina den final asaya ya minute 46 nung tembanga liasü. Iba asayamung nung Tanvi minute 204 tashi asayaogo, aser iba ajanga la tashi tendangogo.

Tanvi ya senior asaya nunga takok tajung ngur aliba asayar ka lir. Lai Pontianak International Challenge kokogo aser iba asayamung nung lai top-100 asayar ana koka liasü.

Test cricket puti otsü nung shingaia tongteta maliba alizüing ka Root-i tongtetogo



Rongjui/September 13, 2026 (Agencies): Joe Root-i pa indang career nung alizüing tasen ka tongteta pa ya Test cricket asaya tenzüker küm 147buba nung fourth innings nung run 2000 yangluba mezüingbuba asayar kümogo.

Pakistan den Edgbaston nung tasembuba Test asayaba mapang out mesür run 62 yangluba sülen England nunger nüngtugu asayar yagi iba alizüing tongteta liasü.

Fourth-innings nung batting amenba ya Test batter ka atema tetendangba tulutiba ta züingshir. Iba mapang tashi nungbo pitch ya ayatsü kanga tasak kümer alir, aser iba den target kwi aji

jangjar alir aser run arishiba team asoshi asayar out asüba shia asaya makoktsü anasabai anir aoer.

Pakistan den tatembangbuba Test asaya nugn run 130 arishiba mapang Root-i iba alizüing tongteta liasü. Mezüingbuba over nung Ben Duckett aser Emilio Gay na out süatokba sülen England team jenjang mejungi aküm.

Asaya jenjang mejungi aliba mapang Root batting ameni ai, aser taoba asayatem nung ama pressure nung aliba mapang Root-i kanga süngjemer asaya-a team takok dangi ani.

Root aser Jordan Cox nati team jenjang yanglushi aser

tenaprong out mesüi Pakistan-i yanglur aliba run 129 ya menepa liasü. Iba asaya nung Cox-ia run 59 yanglua liasü.

Test captain mapa tanaben agizükba sülen mezüingbuba Test nung Root-i aniba team yagi asayamung 3-0 agi kokogo.

Kasa mapang nung Root ya Edgbaston nung Test asaya nung run 1000 yangluba mezüingbuba batter kümogo. Iba asaya metenzük tsüingda pai Edgbaston nung run 958 yanglur liasü aser run 1000 ajungtsü atema run 52 nüingdaka liasü. Edgbaston ya Root atema test asaya nung run 1000 yangluba venue pezübuba kümogo.

Pa ya Jacques Kallis aser Ricky Ponting na sülen venue pezü nung run 1000 yangluba asayar tasembuba kümogo.

Maneni Root-i out mesüi run 62 yangluba sülen pa ya Test asayartem rongnung Test asaya nung half-century timtiba yangluba asayar kümogo. Pai tang tashi nung Test half-century 69 yanglur lir aser Sachin Tendulkar ajatetogo, shibai Test asaya nung half century 68 yanglur liasü.

Chaminda Vaas Delhi Capitals bowling coach kümogo

New Delhi, Rongjui/September 13 (Agencies): Taoba mapang Sri Lanka team nungi left-arm pacer Chaminda Vaas Delhi Capitals nung taruba IPL season atema bowling coach ama adentsü renema lir.

Iba mapang atema Delhi Capitals kiburtemi taoba mapang India nunger bowler ana den sensaksema liasü, saka takok mongutet.

Osang ajanga ashiba agi, Delhi Capitals puri iba mapa atema taoba mapang India team nungi fast bowler Zaheer Khan aser spinner Anil Kumble na dang asüingdang saka tenangzüktepba meyangluteti tembangogo.

Season ana tashi head coach Hemang Badani, director Venugopal Rao aser bowling coach Munaf Patel nunger lenisüba nung club-i junga masayateti aruba sülen taruba season atema coach tem melentsü asoshi DC pur tang

jenjang agiba mapang ka lir.

Batting coach mapa abentsü atema club-i Yuvraj Singh shimatokogo.

"Zaheer Khan den sensaksem talangka kaogo. Franchis-isa Kumble den iba mapa atema jembidang saka tenangzüktepba ka meyanglutet," ta source kati metetdaksü.

Capitals pur tang tashi head coach ka meshimi lir.

Chaminda Vaas ya Sri lanka nunger bowler tem rongnung tajungtiba ka ta züingshir, aser pa kanga takok ngua asayar asaya nungi anizüingzükgogo.

Vaas ya ODI puti otsü nung ODI asaya ka nung wicket 8 agiba mezüingbuba asayar lir, koba tang tashi shingaia menepa mali. ODI asaya nung Vass ya wickets 300 agiba asayar tanobusang lir. Maneni pa ya Sri Lanka nunger asayartem rongnungi ODI asaya nung hat-trick ka agiba mezüingbuba asayar lir.

BILEMDANGANG

"Azümesen agi nisung ka rajang kümdaktsür."